


周氏醫學叢書

第八冊



本艸經疏卷七

艸部上品之下

總五十三種今疏其要者二十五種

藍實

芎藭

黃連

絡石

本蓮附

蒺藜

黃耆

肉蓯蓉

防風

蒲黃

續斷

漏蘆

營實

天名精

決明子

丹參

茜根

五味子

蘭艸

忍冬

蛇床子

景天

茵陳蒿

沙參

王不留行

長松

藍實味苦寒無毒主解諸毒殺蠱蚊疰鬼螫毒久服頭

不白輕身其葉汁殺百藥毒解狼毒射罔毒

〔疏〕藍實稟天地至陰之精故其味苦寒而無毒其用主解諸毒殺蠱蚊疰鬼螫毒久服頭不白頭白者血熱也藍能涼血而解熱故令髮不白也熱去而血得所養故身輕其葉汁解百藥毒解狼毒射罔毒藥性論云藍實味甘能填骨髓益心力汁止心煩躁由此觀之苦寒而兼甘可知矣日華子又云治天行熱狂疔瘡遊風熱毒腫毒風癰除煩止渴殺瘡解毒藥毒箭金瘡血悶排膿小兒熱疳小兒丹熱最爲要藥其功用之廣具如木艸所載蓼藍最堪入藥甘藍人食去熱黃

主治參互

藍汁入麝香雄黃治蜘蛛咬有神 乾藍爲末同火

肉空腹食之主長肉內塞

簡誤

虛寒人及久泄畏寒腹中覺冷者勿服

芎藭味辛溫無毒主中風入腦頭痛寒痺筋攣緩急金瘡婦人血閉無子除腦中冷動面上遊風去來目淚出多涕唾忽忽如醉諸寒冷氣心腹堅痛中惡卒急腫痛脇風痛溫中內寒

動宜作痛

〔疏〕芎藭稟天之溫氣地之辛味辛甘發散爲陽是則

氣味俱陽而無毒陽主上升辛溫主散入足厥陰經

血中氣藥扁鵲言酸以其入肝也故主中風入腦頭
痛寒痺筋攣緩急金瘡婦人血閉無子別錄除腦中
冷動面上遊風去來目淚出多涕唾忽忽如醉諸寒
冷氣心腹堅痛中惡卒急腫痛脇風痛溫中內寒已
上諸病皆病在血分正以其性走竄而絕無陰凝黏
滯之性故入血藥上行而不可多用耳

主治參互

同地黃當歸芍藥爲四物湯通主入血分補益 同
荊芥白芷當歸地黃芍藥木甘艸治破傷風冬月加
桂枝 同當歸地黃乾漆延胡索五靈脂芍藥牡蠣
粉京三稜治血瘕 同白芷茜根黃耆金銀花生地

黃能排膿消瘀血 同甘菊花當歸地黃天門冬白芍藥炙甘草專主血虛頭痛火盛者加童便服 同當歸尾桂心牛膝治子死腹中 同續斷懷熟地白膠杜仲山茱萸五味子人參黃耆酸棗仁治血崩久不止

簡誤

芎藭性陽味辛凡病人上盛下虛虛火炎上嘔吐咳嗽自汗易汗盜汗咽乾口燥發熱作渴煩躁法竝忌之

黃連味苦寒微寒無毒主熱氣目痛背傷淚出明目腸澼腹痛下痢婦人陰中腫痛五藏冷熱久下洩澼膿血

止消渴大驚除水利骨調胃厚腸益膽療口瘡久服令人不忘

〔疏〕黃連稟天地清寒之氣以生故氣味苦寒而無毒味厚於氣味苦而厚陰也宜其下洩欲使上行須加引導入手少陰陽明足少陽厥陰足陽明太陰爲病酒之仙藥滯下之神艸六經所至各有殊功其主熱氣目痛背傷淚出明目大驚益膽者涼心清肝膽也腸澼腹痛下痢別錄兼主泄澼泄者瀉利也澼者大腸下血也俗呼爲臟毒除水利骨厚腸胃療口瘡者滌除腸胃脾三家之溼熱也久服令人不忘者心家無火則清清則明故不忘禪家習定多飲苦茗亦此

義爾

主治參互

同赤檉木葉入三黃石膏湯治痧癰已透而煩躁不止有神 入當歸六黃湯加棗仁龍眼治盜汗有神

同地黃甘菊荆芥穗甘艸梢芎藭柴胡蟬蛻木通

治風熱上攻目赤痛 黃連末一兩同雄羊肝一具

生搗勻衆手丸如桐子每服以滾漿水吞廿一丸諸

眼目疾及障翳青盲皆主之禁食豬肉雖油汁亦勿

入口作六劑必效矣 同當歸甘菊花人乳浸蒸入

明礬銅綠各少許洗目甚效 同芍藥蓮子藕豆升

麻甘艸滑石紅麴治一切滯下膿血 同槐花枳殼

乳香沒藥治滯下純血腹痛煮服神效 同五穀蠹

蘆薈白蕪荑青黛白槿花白芙蓉花治小兒一切疳

熱如神 同赤小豆爲細末傅痔瘡妙 同乾葛并

艸升麻芍藥治痧癰後泄瀉 同五味子麥門冬乾

葛治酒病酒傷如神 同五味子甘艸煮濃汁漱用

治口糜口瘡良 同麥門冬五味子治卒消渴小便

多良 同人參蓮子治虛人患滯下及老人產婦滯

下不止

簡誤

黃連味大苦氣大寒羣艸中清肅之物其處上經譬

猶皋陶之在虞廷明刑執法以禁民邪是其職也稷

契襲龍之事則非其任矣故祛邪散熱蕩滌腸胃肅
清神明是其性之所長而於補益精血溫養元氣則
其功泊如也凡病人血少氣虛脾胃薄弱血不足以
致驚悸不眠而兼煩熱躁渴及產後不眠血虛發熱
泄瀉腹痛小兒痘瘡陽虛作泄行漿後泄瀉老人脾
胃虛寒作瀉陰虛人天明溏泄病名腎泄真陰不足
內熱煩躁諸證法咸忌之犯之使人危殆大忌豬肉
絡石味苦溫微寒無毒主風熱死肌癰傷口乾舌焦癰
腫不消喉舌腫不通水漿不下大驚入腹除邪氣養腎
主腰體痛堅筋骨利關節久服輕身明目潤澤好顏色

不老延年

傷宜
作瘍

〔疏〕絡石稟少陽之令兼得地之陰氣其味苦其氣溫微寒而無毒入足陽明手足少陰足厥陰少陽經故主風熱死肌癰傷口乾舌焦癰腫不消喉舌腫水漿不下皆苦溫通氣血血屬陰陰寒入血而除熱之效也又能除邪氣養腎主腰髓痛堅筋骨利關節療蛇毒心悶刀斧傷擣封立差皆涼血除熱之功也本經久服輕身明目潤澤好顏色不老延年陳藏器以爲能變白亦指益陰涼血而言也生石上者良

主治參互

絡石搗汁入諸解毒藥治發背癰疽神效 外臺秘要治喉痺喘息不通須臾欲絕以絡石一兩水一升

煎取一大盞去滓細細喫須臾卽通

簡誤

陰臟人畏寒易泄者勿服

木蓮薜荔也附本而生得木氣故名木蓮俗呼鬼饅頭黃緣樹木墻壁三五十年漸大枝葉繁茂葉長二三寸厚若石韋生子似蓮房打破有白汁停久如漆六七月實內空而紅則滿腹細子大如稗子一子一鬚其味微澀其殼虛輕一年一熟子亦入藥頌曰薜荔絡石極相類莖葉粗大如藤狀木蓮更大於絡石四時不彫蓋稟天地陰寒之氣而生者也故其味酸寒辛平無毒用其葉研爛絞汁和蜜飲數升并傳癰

上能消背癰下利卽愈考木蓮無經文者爲其與絡石相類也俱以杜仲牡丹爲之使惡鐵落畏貝母菖蒲

蒺藜子味苦辛溫微寒無毒主惡血破癥結積聚喉痺乳難身體風痒頭痛欬逆傷肺肺痿止煩下氣小兒頭瘡癰腫陰潰可作摩粉其葉主風癢可煮以浴久服長肌肉明目輕身

〔疏〕蒺藜有二種一種同州沙苑白蒺藜一種秦州刺蒺藜白者感馬精所生刺者感地中陽氣所生本經苦溫別錄加辛及微寒竝無毒夫苦能泄溫能宣辛主散主潤故刺蒺藜主惡血破癥結積聚喉痺乳難

身體風癢頭痛欬逆小兒頭瘡癰腫陰瘡葉主風癢
可煮以浴辛入肝肝主風也藥性論云白蒺藜味甘
微腥甘中必有辛辛能潤故主欬逆傷肺肺痿此煩
下氣久服長肌肉明目輕身以其入腎益精故也專
餌長年效可責矣單行雜療主治良多本草諸方咸
堪選用形如羊腎圓而細色如菜豆嚼之作菜豆腥
氣爲未煮之則香同新茶者眞

主治參互

刺蒺藜同何首烏菴蓂葉胡麻地黃木瓜荆芥穗天
門冬黃蘗治遍身風癢 同州白蒺藜得蓮鬚山茱
萸五味子蓮肉覆盆子魚膠龍骨白膠能固精益腎

令人有子兼主小便遺瀝 得甘菊花甘枸杞子決
明子女貞實槐角子能明目 外臺秘要單服能復
明三十年目疾

簡誤

同州蒺藜性能固精命門火熾陽道數舉交媾精不
得出者勿服

黃耆味甘微溫無毒主癰疽久敗瘡排膿止痛大風癩
疾五痔鼠瘻補虛小兒百病婦人子藏風邪氣逐五藏
間惡血補丈夫虛損五勞羸瘦止渴腹痛洩痢益氣利
陰氣生白水者冷補其莖葉療渴及筋攣癰腫疽瘡
疏黃耆稟天之陽氣地之冲氣以生故味甘微溫而

無毒氣厚於味可升可降陽也入手陽明太陰經甘
乃土之正味故能解毒陽能達表故能運毒走表甘
能益血脾主肌肉故主久敗瘡排膿止痛風爲陽邪
凡賊風虛邪之中人也則病癘風經曰邪之所湊其
氣必虛性能實表則能逐邪驅風故主大風癰疾五
痔鼠瘻補虛兼主小兒天行痘瘡之在陽分表虛氣
不足者小兒胎毒生瘡癰別錄又主婦人子藏風邪
氣逐五藏惡血者血不自行隨氣而行參合血藥則
能之矣補丈夫虛損五勞羸瘦者通指因勞陽氣乏
絕所生病也甘溫益元氣甘溫除大熱故通主之氣
旺則津液生故止渴血虛則腹痛中焦不治亦腹痛

脾胃之氣不足則邪客之而洩痢補中氣則諸證自除矣益氣利陰氣者陽生陰長故也

主治參互

黃耆在補中益氣湯甘溫能除大熱爲治勞倦發熱

之要劑 同生熟地黃黃檗黃芩黃連當歸加酸棗

仁炒熟研爲治陰虛盜汗之正法 本方去三黃加

人參五味子酸棗仁治表虛自汗 同桂枝白芍藥

防風炙甘草能實表治表虛畏風傷風自汗 與茅

山朮生地黃等分牛膝黃檗減半作丸治積年溼毒

癰瘡百藥不效 外臺秘要主甲疽瘡腫爛生腳指

甲邊赤肉出黃耆二兩藺茹三兩苦酒漬一宿豬脂